

## Benoît de Sainte-Maure, *Roman de Troie* (extraits du prologue)

<b>S</b> ALEMONS nos enseigne et dit, E sil lit hon en son escrit, Que nus ne deit son sens celer ; Ainz le deit hon si demonstrier Que l'on i ait preu e honor, Qu'ensi firent li ancessor. Se cil qui troverent les parz E les granz livres des set arz, Les philosophes, les traitiez Dont toz li monz est enseigneur Se fussent teü, veirement Li siecles vesquist folement : Come bestes eüssons vie ; Que fust saveirs ne que folie Ne seüst hon fors esgarder. Ne l'un de l'autre dessevrer. Remembré seront a toz tens E coneü par lur granz sens.	4 8 12 16 18
Et qui plus siet, e plus deit faire : De ce ne se deit nus retraire. E por ce me vuell travailler En une estoire commencer Que, de latin ou je la truis, Se j'ai le sens e se ge puis, Le voudrai si en romanz metre Que cil qui n'entendront la letre Se puissent deduire el romanz. Mout est l'estoire riche e granz E de grant ovre e de grant fait. En maint lué l'avra hon retrait, Saveir cum Troie fu perie, Mes la verté est poi oïe. Omers, qui fu clerz merueilleus, Des plus sachanz, ci trovons nos, Escrist de la destruction, Del grant siege e de l'achaison Par quei Troie fu desertee, Qui onc puis ne fu rabitee. Mais ne dist pas ses livres veir, Car bien savons, sens niul espeir, Qu'il ne fu puis de cent anz nez Que li granz osz fu asenblez. N'est merueille s'il en faillit, Qui unc n'i fu ne rien n'en vit.	31 32 36 40 44 48 52 56